

Vetor Pixani qu. sier Marin, et per esser bon numero di cazadi, che la sia introduta in le do quarantie. Fu presa.

Vene, essendo Gran Consejo suso, do man di letere di campo, di sier Domenego Contarini provedador zeneral, di 2, ore 20 et ore 3 di note, date a la Chava, ch'è loco sora Po, et vicino a Cremona mia Scrive che spagnoli, ch'erano a la Trebia, fevano il ponte, ma li mancava alcuni burchi a compir; el qual ponte era di sopra, dove è li nostri, mia 15, et il capitano zeneral havia mandato sier Zuan Vituri provedador di stratioti con alcuni cavali lizieri di là a sopraveder. Francesi quel zorno doveano esser alozati a Novara, dove è il Duchà con 5000 sguizari. Scrive zerca danari per pagar le zente nostre etc. *Item*, manda letere aute dal Griti.

Di sier Andrea Griti procurator, date in campo di Franza, a, a di 2. Come erano mia 7 lontan di Novara, et il zorno sequente si apresenteriano sotto la terra, et volevano veder se con danari la potesseno conzar con sguizari. Scrive coluii abuti con quelli capitani francesi e missier Zuan Giacomo Triulzi etc.

172* *Di Vicenza, di sier Nicolò Pasqualigo podestà et capitano, di eri. De occurrentiis*, e di l'ussir certo di Verona le 3 bandiere con 7 pezi di artelarie et vanno verso Trento etc. Noto. Dito podestà à fato retenir tre citadini di Luschi per sospeto di rebellion, li nome di quali è qui soto. Quello seguirà ne farò nota, *videlicet* Zuan Antonio di Luschi, Da Brazon dotor, et Heter di Luschi. E poi, visto esser innocenti, fono lassati.

Di sier Nicolò Vendramin provedador executor, di Vicenza, di 4. Dil zonzer li et aver trovato in tutto 400 cavali et fanti 500 pagati, zoè Jacometo da Novello 200, Zanon da Colorgno 200, Bergamo da Bergamo 100, et zercha 35 homeni d'arme dil Manfron e altri; el qual Manfron è li. *Etiam* si ritrova el conte Bernardin venuto di Padoa li; Batista Doto à fato 400 fanti benissimo in hordine et ha dato ducati uno per uno. Scrive è mal lassarli; et come aspetava zonzesse Agustin da Brignan, che veniva dil Polesene; sichè vol ussir fuora et monstrarsi etc. À molti homeni comandati dil visentin.

Di Padoa, di sier Alvise Emo capitano e vize podestà, di ozi. Come era morto in quella ora el strenuo Zuan Forte condutier nostro, abuto li sacramenti ecclesiastici; et *in articulo mortis* ricomandò suo fiol a la Signoria, et pregava fusse contenta darli la sua conduta l' havia etc.

Da poi Gran Consejo restò Pregadi, et fo lete queste letere, et posto, per i savii, una letera in campo al provedador zeneral in risposta di sue; et che volendo il Griti con quelli capitani regii che i passi, debbi far quello li par meglio per l'impresa; et che il tutto saria che francesi, che sono cussi potenti, fosseno a l'impeto de' spagnoli, con altre particolarità. *Etiam* fu posto una letera a sier Andrea Griti procurator, ch'è in campo di Franza, che il meglio saria persuadesse quelli signori a passar Ada et esser uniti con li nostri, e veder di cazar spagnoli o romperli, *ut in litteris*. Di queste letere non è di opinion sier Antonio Grimani procurator savio dil Consejo, et voleva indusiar et veder quello farà francesi a Novara. Et volendo mandar dite letere, andò, per andar in renga, sier Zorzi Emo, ma sier Antonio Grimani procurator, per esser di Colegio, andò lui et contradise, dicendo non è da passar di là per niun modo; li rispose sier Domenego Trivixan cavalier procurator savio dil Consejo. Poi parlò sier Polo Capelo el cavalier, *etiam* lui non è di opinion che nostri passino. Poi parlò sier Zorzi Emo, qual è di questa medema opinion, ma vol scriver le letere in altra forma. Ultimo fo sier Antonio Trun procurator, savio dil Consejo. Andò le letere: fu prese di 10 balote, e comandà gran credenza e sacramentà el Consejo. Et veneno zoso a hore una di note.

Scurtinio di podestà e provedador a Breza 173
justa la parte.

Sier Alvixè Bon el dotor, fo di Pregadi, qu. sier Michiel	33.141
Sier Thomà Lion, fo provedador a le biave, qu. sier Filippo	59.104
Sier Orsato Justinian, l'avogador di comun, qu. sier Polo	61.100
Sier Piero Badoer, è di Pregadi, qu. sier Albertin dotor	42.120
Sier Piero Pasqualigo dotor, cavalier, è di la zonta	45.116
Sier Zuan Moro, fo a le raxon nuove, qu. sier Damian	19.145
Sier Vicenzo Valier, è di Pregadi, qu. sier Piero	33.116
Sier Andrea Baxadona, è di Pregadi, qu. sier Piero	32.130
Sier Antonio Bon, fo podestà a Chioza, qu. sier Nicolò	61.103
Sier Marco Zantani, fo podestà a Chioza, qu. sier Antonio.	45.116